

四庫全書

集部

欽定四庫全書

清惠集卷四

明 劉麟 撰

奏疏

推薦將官疏

准兵部咨為傳奉事該司禮監太監扶安傳奉聖旨說  
與兵部即今邊方多事原選團營聽征人馬著如法操  
練以備調用營伍官軍缺少的便上緊設法選補務要

充實將官已經推舉不係見任的便行文取來聽用在京在外軍職有謀出衆可備征戰的還着兩京九卿科道官及撫按官從公具名推薦你部裏再加訪察奏請取來以備緩急之用但不可徇私濫舉欽此欽遵備咨到臣訪得分守保定地方副總兵官左軍都督府都督僉事楊銳器度忠醇而不悍不渝韜畧優長而有為有守昔在安慶戮力討賊繕城浚井逆覩猶吞之變破艦焚樓首挫烏合之鋒今守保定推食解衣傾赤心於軍

士訓射辭田振清譽於屬僚况先是忠邪一疏士論相  
高而迄今歌頌同聲賢名益著似茲武臣可謂內竭謀  
猷而外消禍亂隨試皆有成效者也然保定乃畿輔重  
地南連諸郡北接三關在銳領之必謂踰于涯分而總  
兵專職鎮守重權以銳充之終當大有作為况前任巡  
撫都御史周季鳳夙嘗論薦不謂寢閣至今假令本官  
精力坐銷其於人材不無可惜如蒙乞勅兵部再加訪  
察果若臣言早為陞用或以保定地方之重更代苟難

其人亦必查銳勞績量議階勲改加服色責令分守行事照舊如此則輿論獲平臣工攸勸其為銳者必將借前筭以報稱之餘而作長城於聖明之下矣

積穀預備倉糧以賑民疏

直隸廣平府知府蔣彬申據冀州武邑縣知縣王紀議稱本縣秋糧原額每年畝二千八百餘石三年共計七千餘石小民輸納不前甚至賣產鬻子若限三年之內積穀有三萬餘石揆之事勢實難舉行乞要寬減立為

成法一節為照積穀一事天下大命所關古者三年耕  
餘一年之食九年耕餘三年之食經國大計何以加此  
但地有南北產有肥瘠民有多寡誠有如王紀之所論者  
焉合無俯從本官所請具奏量為寬減或將在庫一應  
贓罰變賣銀兩糴穀上倉一則以備荒歉一則以通仕  
路惟復別有定奪等因具申到案又據武邑縣申准本  
府帖文備奉巡撫劉都御史案驗該吏部題奉聖旨這  
行取各官還要歷俸三年以上知縣仍著撫按官查考

任內照例積穀及數的方許起送欽此欽遵續該吏部覆題積穀事例戶部議行未久將今次行取官員暫照舊規起送奏奉欽依准行外為照儲積大計方今風憲缺官取用之日天語丁寧垂念如此又云及數方許起送其綜覈名實之嚴思患預防之意可謂至切至重若非吏部用人之急再為寬請則各官皆難起送惰慢既彰遷除無望豈不靡然自棄雖有他美亦無以自贖也見今任淺未蒙行取官員可不各思其事及此閒暇勤

政受詞多方區畫不計私囊每存國計片紙一錢俱為  
儲積損豪右之利抑緇黃之濫作奸者繩之犯科者繩  
之務使倉有餘粟民有所天災生則發賑以安人心盜  
起則足食以安兵計陞遷則起送不留行取則考查無  
碍不惟公私有賴而上下亦交盡矣如不率從本院臨  
期亦行題請不容起程雖廷議急於用人而虛名無實  
之人亦難擢用慮恐各官因循誤事再此申明務須勉  
修職業毋貽後憂為此仰各府當該官吏俱查照節奉



勅諭并近奉欽依內事理原行所屬各官務要照例積穀聽候本院委官查盤不許虛文抵飾以舊作新以無為有索民領狀冒作放支攪和糠粃以為實數一應弊端俱不准理仍題問罪即行罷黜又有地瘠民貧極災去處備由申來但不許一槩謬申惹咎抄案依准差該吏費繳奉此案照先奉本府帖文為勅諭事節奉巡撫劉都御史案驗前事行令照數積穀已經遵行外今奉前因安敢玩視自取罪譴為照今議定積糧之數雖江

南膏腴之地歲歲豐登猶或難完况江北以來地利不同若不分別等第一槩取盈竊恐徒為張急難收後効茲以武邑一縣言之原額二十五里三年扣該三萬通計一縣丁口三萬有餘每年秋糧止該二千五百餘石總計三年不過七千有餘蓋亦盡一縣丁口所輸僅得如此之數輸納不全中間鬻男賣女者已不能無若三萬措置又不能出此丁口之外且措置見行之法多在詞訟之門使人人皆訟然亦有貧富不同富者尚可貧

者何堪豈能使其一一如法不恤其貧而必欲罰贖以充其數縱使不恤至於蕩產流移而復賑之是科之使貧而行吾惠也似非積穀本意且守令賢愚不能奉行偏駁不一竊恐令嚴事急衰懦者將引退以避責貪饕者或假此以營私急于功以圖進用者皆將不顧民命而刻意料理鼓舞好尚之間追徵逼迫之下安保不至於他虞如逆瑾之時徵求太急而山東河南之寇一時蠭起皆其所激征討勦捕之費與措置之入其利孰多

事勢或致如此本欲濟民而反病民本欲彌變而反致變於此必有稱停損益之法可也若此數不足陞遷不得離任行取不得起送繼是任者亦不能神運鬼輸以足其數亦惟甘坐罷去耳為今之計必分別南北計歲豐凶量減分數立為成法其罪人紙米悉令納穀上倉不許折收輕價以圖侵漁贓罰銀錢及變賣贓物隨時變賣議糴不許久貯以致花費如此則倉廩雖未充盈而有司猶有善政生民之福祉稷之福也為此合關本

縣煩為轉達裁處等因備關到縣具申到臣已經牌仰本官議處回報去後今據前因惟國以民為本百姓以食為天經制之大儲蓄為上故將欲安民者必先積穀但百里之外風氣頓殊而物之不齊物之情也今使九州一律勢豈能同若北方郡縣每里必取一千五百之數十里百里以數而推地至百里糧至一十五萬北方里社戶口幾何生產幾何常賦幾何詞訟幾何是就其耕桑所入盡數取之不足以充前數即以武邑一縣言

之原額二十五里三年例該積穀二萬五千常出常賦  
三年不過七千餘石今欲至二萬五千則是額外巧取  
倍於常賦數多其他州縣亦多類此況是以十年為率  
災傷俱半又勢有所不能行者積穀惟詞訟一事其言  
為正但有力者少無力者多近有事例雖有力亦減若  
令事事輸穀人人贖罪則貧者死於縲紲猾者逃於異  
鄉本欲積糧而其源反塞非計之得此外又有勸諭一  
途不過望門橫索未免濫及無辜加以官貪吏弊其害

不可勝言昔也止於貧者不安今也富者亦無不病尤為失計縱使用刑勸諭一切不顧而見行之數太多亦恐未足本官有見於此所以關申詳切揆之事勢委有不能若謂成命已下不敢違阻而大勢相懸難於責効循良者累歲不遷橫斂者胥讒致慝蓄積未盈本根先瘁國家一舉而理財用人之道皆廢誠可憂也為今之計必須俯鑒北方地瘠民貧將前項積穀之數或照所辦秋糧以為贏縮又視災傷輕重以為行止十里以下

議積糧一萬五千石改積若干二十里三十里以至七  
百里八百里俱各以秋糧為則照前遞減如每歲納糧  
千石者止可令其積穀九百石八百石秋糧萬石令其  
積穀九千石八千石而百十皆然又不及數方照前議  
夫復何詞中間又有水旱蟲荒兩收無望仍與官民分  
豁小饑則發銀遠糴大饑則開倉議賑不必更拘前數  
以恤貧民其應否分豁即照奏勘災傷以為分數如此  
則事有本末政有差等官才民力經久可行再查直隸



保定六府見今數年水旱相仍而大奸大盜縱橫之後  
民之憔悴其在北方尤為特甚欲議積穀如數必須仍  
待豐年見今勅旨已布雖竭力奉行不過理刑贖罪盤  
驗賠補常行之數安能便有厚積惟是巡撫以來禁約  
諸司不敢擅興工作裁抑浮費月稽季考一錢寸帛囊  
括在公除起運糧站等項額例不敢輕重者聽其轉解  
外其餘百計清查但有贏餘上倉入庫一一查盤封號  
計今所積除已經放賑開除不算外見在倉糧共四十

六萬五千九百七十三石有零自巡撫以後日月所積約有二十萬餘石銀兩亦除放賑修倉修庫等項開除不算外見在鞘封及新收未曾入鞘一應可以糴穀官銀通計共該銀十萬一千五十餘兩遵照勅旨就其區畫救時之意莫如議糴雖前項銀數不多而費不煩公斂不動衆損上益下計出政平中熟而糴擇地而行擇戶而授每銀一兩糴穀三石每一上中人戶領銀不過三十兩糴穀不過百石或者以為價減斗增比之望門

勸罰不為無故即使穀價稍貴斗石稍增每銀一兩所  
增三斗六斗有事而發悉以為民不為太甚但前項銀  
兩儲積一方命脉全在於此括索之煩怨有所集今欲  
倒囊動支誠非細故況此本六府掌印各官經收就令  
支銷出入一人之手必致事久難明合無勅下戶部選  
差公正主事一員親詣各府望秋糴買督率各該官吏  
搶揚播晒潔淨乾圓仍預先定擬何處地僻有糧儲穀  
宜少何處地衝糧少儲穀宜多斟酌分派已定倉廩已

修者如法鋪墊未修者一面完修若廩座不穀亦許量  
為增蓋臣已預先行屬整理未盡其修倉糴糧地方廩  
幹官員俱聽本官從宜定委奸貪誤事者悉聽拘提參  
究臣亦多方覺察從公區處事完之日將支過銀兩糴  
過糧數通行造冊回奏不足之數許待豐年仍將舊積  
糧數通行查盤另廩收貯仍將新買舊積糧數分別明  
白置立木牌書記各廩之上以便查考其盤驗若侵欺  
短少悉聽本官拏究追賠如此則任上立法政有可經

以義制利官有定守理財用人之道一舉而兩得矣

分別情罪早賜發落以安地方疏

按直隸順德府內丘縣申稱本年七月二十八日蒙錦衣衛官校前去順德府將知府羅玉邢臺縣署印大名府魏縣知縣王芳典史驛遞等官通行捉拏口稱奉有聖旨未委虛的仍往大名府去訖次月初三日大名府稟報兵備副使劉秉監被拏與內丘所稟相同案查先據副使劉秉監呈稱本年五月內前去順德府公幹住

宿察院本月二十四日公事已完欲回大名府隨據該  
府龍岡驛稟稱有經過賴太監將到本職當令夫役搬  
運卷箱起行間忽有跟隨本官家人賴宗等騎馬從中  
門直入職衙門稱說甚麼兵備管著我等語職當將守  
門人役責治及將賴宗等戒諭就被各兇仍騎馬匹由  
中路前去架捏不知何等虛詞稟報太監賴義就被本  
官帶領賴宗等前來職衙門揪採凌辱詆罵之言至不  
忍聞職據理與論本官理屈詞窮稱說職不行迴避等

因其呈到院會同巡按監察御史王鈞看得太監賴義等奉迎恭穆獻皇帝神主竭力奔馳日行常至三百餘里地方自有公幹以來未聞人衆速行如此電掣風飛官吏誠有不能前知而預待者方其始去也倏忽即至姓名不通是以兵備副使劉秉監迎候不及至入相見劉秉監既不迴避又復喧攘則罪豈可辭今彼各執一詞其事之有無聖明必能洞察臣等又復何言若奉迎既還之時臣等俱到地方叅候行禮別無違誤且臨近

順德府治沙河水漲神輿前渡官吏後行水勢驟增洶湧可畏因而阻隔然而僅差數刻之間追從不及人所共知是日各官隨即趨至內丘縣公同行禮亦是順德境內地方中間如署印官魏縣知縣王芳部夫撥馬又在各官之後力所難及且居官平素公勤幹辦臣等選委在彼協助辦事誠有自取況不係邢臺縣的確正官前次賴義經過之時王芳又在原縣管事並無失禮今一旦誤遭逮繫其情不無可憫又切惟聖孝純篤奉迎



之舉恨不親御六飛以申至敬顧乃託之義等戒以過  
行惻隱可知今聞官吏有所違忤豈不赫然震怒以為  
大罪殊不知一義不合而百禮不成水患人情並成乖  
異地方之不幸耳夫馳驟太速人不及知跋涉既難禮  
行不及此劉秉監羅玉所以小失而大廢也陛下仁聖  
天高聽遠豈能究極細微各官事情本只如此何足深  
治臣等待罪撫按提挈綱維實膺重寄盛禮過行而戒  
飭不嚴大水驟至而區處無術以致激怒近臣煩黷天

聽烏得無罪亟欲罷黜庶足以為地方誤事之戒其為  
署印官王芳委的因人連累罪不由已伏希皇上宥而  
釋之以昭平明之度其劉秉監羅玉麤鄙忿厲相應推  
問但近日大同地方戕殺重臣軍情內叛山西與直隸  
壤地相連若有奔潰旦夕可至易州兵備既已誤撤大  
名兵備又復拏解則防守緊關之處一切無人事機如  
此誠可寒心况副使劉秉監久寄兵民操守如法剿捕  
劇盜戰陣有功羅玉政拙心公民今愛戴俱係緊要應

用官員亦乞勅下問官早與歸結責令回任保障地方雖有急變猶為可及如此則聽德惟聰網維允賴而情法亦協於中矣

乞恩休致疏

臣係南京廣洋衛官籍江西饒州府安仁縣人由進士歷官八任二十九年以至今職嘉靖二年二月二十日本院到任次月二十五日前到地方行事不料嘉靖三年正月以來得患脾胃虛瘵之症日就尪羸調理不復

見今狼狽不能供職切思臣本草茅遠沐列聖陶鎔之德近承陛下收用之仁叨享祿位不為不久于茲每欲竭智盡心圖惟報稱但臣識淺才凡身孱病劇空懷海嶽莫効涓埃是以日夜憂慙汗常沾背蓋心有餘而力不逮也臣正德年間久病在家本已不能供事及至仰承收用則已衰憊不支但陛下膺天繼統世際亨嘉當此風虎雲龍之會聖作物覩之時奔走疏附孰無是心故微臣受命懼忻踊躍止足之戒不勝其向往之誠又

熱中而妄進也黽勉從事殆將三年新政異恩躬逢其  
盛臣於此時妄擬頽齡或成強健亦將僥倖以副初心  
豈期量滿災生形枯氣竭時雖際遇命已衰殘耳目雖  
存視聽非舊強聞則眩強視則昏實奄奄垂盡而藥久  
無功也本欲觀風而身轉畏風本欲強食而食不稱事  
惻惻可哀將一朝僵仆而竟以貪得鮮終也嗟乎人臣  
事君進禮退義然而病瘁栖栖顧戀不去禮義之正固  
如是乎縱欲自留如曠廢何今臣藥餌自隨遷延僻縣

一月之間多半閉門苟惟尸素猶之可也萬一貽患罪將何如今來撫屬地方二麥連天三關無警是以臣雖抱病幸無誤事知止乞骸此其時也伏乞聖明憐臣新衰查臣舊病放歸田里使終餘年不勝仰感天恩之至臣又伏望陛下慎選賢能代臣巡撫俾之訓兵養民以佐太平之治是臣之退非直苟利臣身而已也

仰乞天恩懇求休致疏

臣南京廣洋衛千戶官籍江西饒州府安仁縣人臣頃

因患病誤事備將遷除履歷並患病乞休緣由具本令家人劉亨齋赴通政司奏奉聖旨劉麟素有才望著用心巡撫地方不准辭吏部知道欽此欽遵備咨到臣臣聞命之日感愧交至臨藥涕零夫狗馬已不堪驅逐而天地猶垂泰養之恩其在人臣豈不勉圖報稱奈何微臣志願無窮而命分有限自前始奏以至於今前後二十餘日形容益減引步益難皮骨空存神精非故未論生還何以供事況畿輔重地萬一誤事如國法何如公

論何縱欲苟延待愈而鰥曠在躬憂畏焚灼不能一朝  
居也臣之詞懇悉具前奏冀有感悟惟是不奉命允再  
陳病狀今勢已迫切別無緣由伏望皇上念臣平生全  
臣末路憐臣疾苦賜臣生還實不勝感戴天恩之至

終乞天恩亟求休致疏

臣南京廣洋衛千戶官籍江西饒州府安仁縣人見任  
前職巡撫地方臣本簿劣誤蒙聖恩謂畿輔重地將臣  
以太僕寺卿超擢往充其任錫臣之榮踰臣之分疾病



偶作恐懼弗寧已曾二次具本乞休濫荷洪恩俱未俞  
允吏部知道每咨到臣輒自感激思奮犬馬至愚恭養  
知戀而天地深恩負戴難名敢不專心藥物勉圖報稱  
緣臣身由南產形骸素弱宦途北土風氣相違兼以自  
少不能謹疾向衰即已彫殘夫省方問俗固君之所以  
命臣而立綱陳紀則臣之所以報君今臣在地方巡行  
未遍疾苦不知撫事久荒叨竊實甚凡若此者非惟內  
省之憂則足以減食而輿論之來能無抱恙又惟自古

人君以任賢為明而人臣以修職為正陛下不以臣為  
不肖舉此大任付之將任賢以修職也而臣抱病曠職  
遲留不去罪孰甚焉況當朝廷清明之日乃有昏眊叨  
竊之人厚顏強立謂人容已謂己無罪凡庸自恕尤可  
怪也況六府三關錢糧兵馬既繁恩怨是非亦衆非病  
倦衰殘之人所可久居伏望皇上大寬失職之誅俯置  
包荒之內憐臣於危迫有生之際察臣於懇惻無為之  
言敕下吏部容令致仕俾臣幸終偷情卒獲固窮誠不

勝感激之至

終乞天恩四求休致疏

臣思患病日久已嘗三次具本乞休其入仕以來遷除履歷之詳巡撫以後鰥曠誤事之實俱已悉陳不敢煩復以黷天聽臣竊思之一官久病陳乞再三別無他故何至謬蒙聖情久不俞允豈不以其人為可用之人或疑其疾為可藥之疾雖極言狼狽之狀而亦不加憫念也尸位已深養養如故渥恩所至死不能忘然不知臣

臣下瞻戀之私尤有甚於主上垂憐之意今不幸如斯豈期得已夫人中氣日虧則客邪日甚纏綿既久憔悴難言大凡攻治之法所資者藥也臣則脾虛不能傳送雖甘暝眩而藥不可到顧養之術所資者味也臣胃弱不能消納雖努力吞啖而食不下咽二者交廢理攝無方雖陛下益以春陽膏同湛露其朽木寒灰無以承之比日以來粥食減少脉理短濇自汗畏風瀉痢頻仍加以兩足消腫不常必賴扶持而起不聞畿輔重地委此

奄奄欲仆之人也是以不避誅戮再此懇祈陛下許之  
雖若捐之設身處地其實哀之微臣得之雖若負之生  
順死安其實成之蓋知止得止臣有安命之義而乞骸  
得骸上有造命之仁於國無損於臣有終自古聖賢亦  
不以為非也惟陛下少加憐察臣又伏枕深思病勢至  
此縱甘叨竊曾幾何時展轉求臣之志不能作臣之氣  
辭榮請罷如殍待餉不飽不已伏望皇上矜臣迫切固  
陋之情敕下吏部容令致仕俾臣早遂生還不勝感激

之至

終乞天恩五求休致疏

臣頃因患病備將休退緣由四次具本令家人齎奏奉  
聖旨劉麟著照前旨亟出供職吏部知道聞命之時憂  
惶無措竊惟臣之所稟弱不勝衣人所共見幸不僵仆  
全由調理所以行年四十有三之日即乞致仕家居臣  
亦自知臣力之不足也况今年長於前心灰於舊加以  
風土不宜其弱其痼不言可知夫人孰無身而臣實已

早衰身孰無病而臣實孤重託每遇地方有事日永途長粥食不繼強吞餅餌滿悶無聊傳送不及瀉痢以作氣虛火動痰眩乘之是時喘息尚微遇事安能酬應以故累次陳情惟求一退且人之脾胃關係一身醫書有言穀入於胃脉道以通其血氣乃行此之謂也今臣前後諸疾分毫不減誠以脾胃一敗而元氣隨之雖百計千方竟不可復入春以來肝木盛強前病已甚中滿痞痛耳痒目黃人或駭於望聞醫亦失於工巧只今屏處

尚憂殞絕其於撫事委的耽延雖聖明矜憫誅誣未加而愚昧叨竊悲慙無措伏望皇上憫臣難治之疾察臣難已之情勅下吏部容令休致使臣早還鄉土則雖死之年猶生之日臣不勝兢業感戴之至


乞恩宥罪卒求休致疏

臣頃以受病之源及誤事之實五次具本差家人貴奏無非畏死完名祈天返祿以終臣節而已猥蒙聖恩不加誅罰仍令供職寵榮踰分悲懼交并緣臣抱病以來



庶事叢脞具奏以後百患紆縈雖狗馬之心本憐生養而蒲柳之質日見彫零即今沉痾已深不能救藥心神恍惚難再當官邦畿重託撫鎮清階必不以臣為無恥授之此官以為養疴素餐之計顧今垂死敢復遷延况三關之兵馬錢糧力雖勤而績用未著六府之貪廉功過心雖勞而舉措或乖古人有言慈父不能愛無益之子仁君不能畜無用之臣臣之誤國妨賢必不可用震怒不加亦云幸矣蠱壞不治豈敢安然况臣始病迄今

曠職又逾數月乎



清惠集卷四

欽定四庫全書

集部

清惠集卷六

詳校官中書<sub>臣</sub>沈 颺

中書<sub>臣</sub>劉源溥覆勘

總校官知縣<sub>臣</sub>繆 琪

校對官編修<sub>臣</sub>吳裕德

騰錄監生<sub>臣</sub>徐 瑤

欽定四庫全書

清惠集卷五

明 劉麟 撰

奏疏

陳言以獻愚忠疏

以下俱工部尚書時上

都水清吏司案呈奉本部送與兵科抄出太子太保兵部尚書兼都御史李永勳奏內開豐沛治河之工二年之內三易大臣用人以下計者三十餘萬用銀以兩計

者二十餘萬而未有成效始也講之不熟而遽行繼而主之不立而中止一行一止糜費孔多今河南山東地方蝗旱荐臻十分狼狽運河通塞國計攸關勢不容已臣愚以為宜令羣臣知水勢者各輸所見下工部集議若所見皆同再行新差侍郎潘希曾親自相度蓋百聞不如一見之真詢謀僉同方可動役寧過慮於未事之前毋悔過於已事之後然智力所及能料其綱而不能料其細能料其常而不能料其變宜令工部奏選於部

官知水利者二人俟興工之後親詣工所體察人情咨詢利害彼往此還各言所見則彼中委曲廟堂悉之千里之遠同於咫尺浮議不能動搖乞下各該衙門作速從長議處施行等因奉聖旨覽奏事關朕的知道了其餘該部看了來說欽此抄出該部送司查得沛縣河於先該總理河道都御史章奏稱黃河上流水發淤塞運船乞要另行議處挑濬等因隨該科道交章乞要推舉諳曉河務大臣一員前去總理前項河患或添差郎中

員外郎一二員前去分投整理等因本部備咨吏部會同推舉南京刑部尚書李等官四員上請簡用一員總提督河道事務等因題奉聖旨是盛應期陞都察院右副都御史著總提督河道事務寫敕與他見今正在緊關經畫之時著上緊前去地方任事欽此已經請敕齎付本官欽遵總理隨該吏部添選署郎中柯維熊員外郎王大化前去分投整理外於嘉靖七年正月內該總提督河道大臣盛應期等議將該挑河自昭陽湖東自



北進汪家口南出留城口約長一百四十餘里堪改運  
河計用銀三十三萬一千四百五十兩議處停當具奏  
前來又經覆奉欽依開挑去後本年四月內為修省事  
該吏部等衙門會題運河一事祖宗計處行之已久屢  
遭決塞不過仍舊修築未聞遽至誤事今聞所濬之地  
舊日積沙以為泉水衝去而黃河之流減殺運道已大  
通矣合無行見在差管河道都御史盛應期且將舊壞  
河堤加築堅實等因會題奉聖旨運河關係至重開挑

新河應止著戶工二部行總提督河道官會同漕運都御史總兵等官作急會議奏來定奪務要不誤將來歲運欽此已經通行各官欽遵去後隨該漕運都御史唐龍總兵官楊銳等各將停止開挑新河緣由具題奉聖旨這修河工程即便停止夫役都著放回各官取回改用總督大臣應設應該作何整理戶部便會工部上緊議處了來說欽此該戶部會同本部從長計處覆奉聖旨卿等說的是河道關係漕運總理無人盛應期柯維

熊等還照前旨取回別用便會推才識老成實心幹事的堂上官兩三員簡用着總理河道事務查照各官議奏事理相度事勢從宜疏濬務使糧運通行不誤將來國計欽此該吏部會同本部推舉得戶部左侍郎梁兵部左侍郎王工部左侍郎潘希曾俱各堪任等因奉聖旨潘希曾著兼都察院左僉都御史總理河道事務寫敕與他著上緊去欽此隨於工科抄出該本官奏稱臣奉命總理河道事務才薄而任重曷勝兢戰然不敢不

竭其愚圖濟大事竊惟近年沛漕沙淤旋挑旋塞蓋由  
秋水泛漲黃河奔衝所致嘗考河流故道非一其大而  
要者若孫家渡經長淮衛地方趨淮入海其一也若趙  
皮寨經符離橋出宿遷小河入海其二也若沛縣飛雲  
橋經徐州趨淮入海亦其一也孫家渡趙皮寨乃上流  
之支河飛雲橋乃下流之支河弘治以前支河分流會  
於淮而入於淮故徐沛不受其害漕渠不為所淤邇來  
上流三支俱就湮塞全河東下併歸於飛雲橋一支下

東徐呂二洪上遏閘河流水溢為游波茫無畔岸於是  
決堤壅沙大為漕患今日之計挑濬舊漕以通糧運加  
築堤岸以防衝決然非疏上流之支河將來秋水復發  
沙雖挑而難保其不復淤堤雖築而難保其不復決探  
本之論固有在矣近因趙皮寨開濬未通該巡撫河南  
都御史潘塤等題稱仍將孫家渡責成河南管河副使  
該戶工二部議題孫家渡責成潘塤督行管河副使加  
意疏濬以殺河勢不許推避誤事節奉聖旨卿等說的

是欽此臣經國至計而該部會議相同蒙皇上斷然行之眞明見萬里也臣私憂過計尤恐巡撫事繁副使力寡萬一疏濬遲誤未免貽患漕渠伏望皇上軫念國計下工部計議合無請敕一道丁寧都御史潘塤即便原督管河副使調集黃河夫役選委相應官員上緊將孫家渡疏濬一應合用錢糧聽其命下之日許令羣臣知水事者各陳所見聽本部集官再議其陳奏未到之先備咨本部侍郎潘希曾及管河郎中丁洪李重備查原

行照新奉敕旨應會同者即便會同應督率者即便督率亦行集議仍親詣見治河渠一一相看或地勢之高卑水勢之增減與凡淤淺衝決之病修築挑濬之宜詢之故老考之載籍務得至當期在可久必惜費於未舉之前乃興工於好謀之後履歷必親衆志無異然後會行各該衙門各以所議具奏畫圖貼說以請聖裁審固如斯則謬妄可免而前車之轍諒無復蹈者矣其稱要將工部知水利者二人詣工體察祇因先失遂有此言

但念今差治河總督官潘希曾為人明達忠懇會官推  
任過舉未聞計程蒞事曾無數月即復貳之以拂國家  
信任之誠阻大臣展布之氣事如過迫合無即用李承  
勛建言之意將應察人情利害就令潘希曾並所會各  
巡撫等官每一兩月一次自行奏報因言考事待以不  
欺是國家於明目達聰之中寓寬洪盡下之道為希曾  
等能不感激思奮將益殫乃心以供乃事矣萬一諸臣  
之奏報不如本部所擬假以一年之期集合其章聽本



部會官議差科道官一員請敕前去從公查勘即其工程驗其情偽若利興患息財力有經於累次奏報皆合成效彰彰則具奏陞賞以嘉其忠萬一不然聽差去官員指實叅奏從宜黜罰俱為未晚是即今奏差官體察之意應否事務待羣臣有陳本部集議然後施行均乞聖明裁處

根究節年拖欠工料補還借過官銀疏

營繕等清吏司案呈查得浙江等處布政司并南北直

隸各府州縣節年拖欠各項工料銀兩八年九年十年以上者有之五年六年七年者有之二年三年四年者有之率以為常除正德十年以前者聽本部查明另行外其正德十年以後嘉靖四年以前各年所欠大約共該折色銀一百四十四萬六百兩有零本色物料三千五百九十萬四千件有零若非司府等官欺公廢職則坐官解人等埋沒侵分前此寬延以成今患失今不究則益固前奸深為未便呈乞究查等因到部臣等隨即

吊卷揭查得嘉靖元年十一月內本部派行順天府辦  
解白榜等紙料共銀六百四十二兩該衙門與本部同  
處一城今過六年不到又如松江府上海華亭二縣本  
部節年派麕皮共六百七十張自正德十年違限至於  
十年有餘人文俱不到部以此推之天下之病不可勝  
言臣等看得前項工料價銀物件下供上用國有程法  
但官庸長偽吏巧成奸上下隔離起徵無法致有今弊  
其利不在小民除嘉靖五年以後正係納解在途之際

若川廣雲貴等處未見過遲另行置簿查處外其嘉靖  
四年以前拖欠之數委屬奸人玩法國用告虛經手承  
行官吏解人俱已違犯雖輕重不同而蠹公殘私為患  
則一以致本部庫銀那借未補數窮理極相應根究合  
候命下之日本部逐一開立前件造成方尺小簿各該  
巡撫御史各抄謄行屬選廉能並著實心幹事司府官  
員照依判款備查某項物料於何年月日坐派何州何  
縣徵解若干或本色若干何人經收何人押解起解程

限已滿并有某衙門堪信批單到卷者該管官司緣何  
不行造報恣其侵盜又有買捏批單似印非印朦朧查  
銷者將經該官解吏戶收頭通行查提先究原解本折  
色官物官銀下落添差殷實大戶管押原解親丁送部  
查納若非本部開作拖欠司府卷內却又查有批單即  
係詐僞就便密切擒拏一體追究應問應追人犯牢固  
扭鎖差人遞解赴部查對追納其解人招出侵欺抵換  
重情應提問者就便提問查照律例從重議擬其應發

遣者仍候銀料追完之日解遣徒流以下贓完方許發落俱照抄招同委過司府官職名回報以憑查考又有一等司府等官將已徵聽解各項工料不分在庫在手銀兩私自挪移借貸別用查究得出雖遷官去任律應紀錄勿論者仍要拘提到官依律究查務要明白候銀解部起程之日方許放回若或肥已問罪黜罷亦取供招回報其巡按衙門仍將本部發來部內各起前項自文書到日限三箇月日以裏一一查明填寫完備先行

差人追繳本部查理若過期不報本部查其輕重分別等第先將見委查勘官叅奏問治其布政司掌印以上官員行移吏部明立文案過缺暫免推陞以警其惰事完方許照舊其各府掌印以下并所屬掌印佐貳等官但與徵解有干者聽各司掌印官嚴立法程問究前項查推根究之法本部每年一次舉奏各該巡按御史事完回京復命之日將查緣由具奏則侵盜一清庫藏可補而工職少修矣臣等又敢冒罪上言凡此皆本部積

久之弊中外臣工言之諄諄聽之藐藐已若不可為者  
若非仰祈天語嚴加戒飭吏民不知警畏御史不即奉  
行文具雖繁無益於事臣等此請雖若過嚴蓋責逋負  
於奸盜之手固將以恤窮民於憔悴之餘也若行巡按  
衙門報有次第又聽臣等括查歲用會官詳議上乞天  
恩將嘉靖歲派通行蠲免明降詔旨頒布天下使知大  
聖人恭儉愛民之心出於尋常萬萬誠足以培植邦本  
而光昭帝德偶有興作必不得已前項清查解到之物



盡可通融應用况每歲該派行文移展轉數月始到若將嘉靖九年應用之物先期派行無徵不及半年應值時和歲稔却有良規人不玩法依期約納一一皆到是國不加征而用無不足天下臣民偶奉一年寬免即漢文賜民田之意則聖德明如日月而聖德廣如天地民生允洽邦土裕如矣臣等實不勝懇切之至

清解納以塞弊源疏

該本部營繕等清吏司案呈伏覩大明律內一款凡監

臨主守自盜倉庫錢糧不分首從并計贓論並於右小  
臂膊上刺盜官錢糧三字四十貫斬又一款凡常人盜  
倉庫錢糧等物但得財者不分首從併贓論罪並於小  
臂膊上刺盜官錢糧三字八十貫絞又一款凡各處徵  
收錢帛買辦軍需成造軍器等物所在州縣交收差有  
職役人員陸續類解本府若本府不即交納差人轉解  
勒令人戶就解布政司者當該提調正官首領官吏典  
各杖八十若布政司不即交收勒令各府就解部者首

領官吏典罪亦如之其起運官物長解官及解物人安置不如法致有損失者計所損之物坐贓論著落均賠還官若有侵欺者計贓以監守自盜論若起運官物不運本色而輒積財貨於所納去處收買納官者亦計贓以監守自盜論一款凡送本戶應納稅課物及應入官之物而隱匿費用不納或作損失欺罔官司者並計所虧欠物數准竊盜論其部運官吏知情與同罪又一款若私物當供官用已送在官而未入倉庫但有等人守

掌在官若有侵欺借貸者並計贓以監守自盜論又一  
款各衙門收支錢糧等物若監臨主守不正收正支那  
移出納還充官用者並計贓准監守自盜論又一款監  
臨主守將係官錢糧等物私自借用或轉借與人者雖  
有文字並計贓准監守自盜論其非監守之人借者以  
常人盜倉庫錢糧者論若將自己物件抵換官物者罪  
亦如之又一款監臨主守若將侵欺那移借貸之數乘  
其水火盜賊虛捏文案及扣換交單籍冊申報瞞官者

並計贓准監守自盜論同條知而不舉者與同罪欽此  
又查得問刑條例內一款各處徵收在官軍需物料應  
該起解銀兩者即係腹裡去處若有監守盜銀四十兩  
者錢帛等物值銀四十兩以上常人盜銀八十兩錢帛  
等物值銀八十兩以上亦照前擬問發邊衛永遠充軍  
為照前項律例備載斬絞充軍徒流之罪不為不重但  
稽考無法蔽瘡已成上下同風不行舉正若不及時立  
法查處則將來之廢不止於今照得本部每年歲派題

派額辦一應工料價銀並本色物件俱經通行浙江等處布政司并南北直隸各府州縣明文已到而過期不完或已徵解差用非人致被侵盜又有假捏批單公然附卷而恣意侵分者或已差人而安置不如法致有損失因而逃避人丈兩不到部或領運官物而原解私自變賣銀兩來京又自收買物件以圖獲利因而遂將銀兩花費亦久不完或被徵收委官及戶長收頭攬包已收在手不行交官交庫隱匿費用故意延捱希圖赦免

或經該人員不即起解私自借貸那移如此奸弊千緒萬端不可枚舉雖本部不次查催而各該司府等官視為故常全不舉報以致年復一年愈深愈痼遇有各項急緊工程只得借湊庫藏別項官銀接濟事至於此則出納不正徵補不明其弊不可勝言祖宗任官置簿興事勸工其意似不如此若不呈乞稽查責令完報則曠鰥之罪何由可贖臣看得工部本折色銀料取之天下其行有二歲派題派而已常例常入一年一派相襲而

行則為歲派因事興工不時又派特請而行則為題派  
是乃小民供上之常非私濫無名之取若官司徵解及  
時則小民輸辦不缺奈何各該司府官員體國幹事者  
少欺公苟祿者多又有釣名飾詐罔上營私者一身之  
廩阜輿馬靡不豐備而公家之宗廟乘輿城池兵甲則  
為不急之務有論皆云損上益下臨政率多干譽玩公  
則是偏之為害而王政之所不行也又有貪污之徒身  
自剝取常例却將正數料價厚其所私因令起解不念



民膏民脂悉舉而委之饑鷹餓虎逆知侵盜明興作成  
此又該司令呈之未發及究所由皆本部稽查無法故  
也本部常年派下司府惟知已解已到者收受而已然  
不知不解不到者何因司府常年起解之後惟知有批  
單者銷繳而已然不知無批單者何故蓋中外遼絕兩  
不究心所以奸頑乘隙恣行侵盜仍有不才之甚者與  
此輩通同為弊展轉彌縫苟有若人則弊端膠於有位  
又安望其振作舉行所以本部清查無復開報歲復一

歲積弊相仍誠為可恨為今之計莫若申明律例早定  
綱維以致謹將來除嘉靖四年以前拖欠者備行巡按  
衙門拏問區處外斷自嘉靖五年以後見解未到新工  
待用之數本部置立工料本折色起解文簿每司二扇  
府各二扇循字一扇環字一扇總於各布政司收發無  
布政司者各府徑收輪流倒換各該衙門遇到仔細收  
閱但有起解本部本折色銀料開寫原行硃語仍立前  
件一行二行空白一行明開某年月日並官解姓名其

布政司有應該動支本司官庫銀兩辦解者照式開填  
本司簿內倒換兩廣雲貴四川福建程途寫遠銀料不  
多年終一次差人賞換不許遲至正月其餘司府州縣  
俱限半年一次差人賞換上半年六月以裏下半年十  
二月以裏北直隸大明等府俱限三箇月一次季終費  
換順天府間月一次月終賞換以四六八十一二為定  
循去環來或與戶部文簿并令差人賞換永為定規本  
部如遇循字簿到即於本部選委勤謹監生督同該吏

查理明白逐一填註某項工料已到某項未到仍於環  
字簿內一樣填寫各司官調卷查無隱漏註寫某官照  
刷相同呈堂驗實果無差漏發付原差人役費去司府  
州各該掌印分管等官收執查出延捱過期者除水程  
之外又加限一二箇月人批不到即係侵欺就便拘拏  
官解的親家屬監併完納候批單至日辨驗明白方纔  
疎放仍於簿內填註下落若官解侵費亦就拏究罪如  
前項律例監併完納施行其賫送文簿過限先將差來

人役送問各該司府官吏叅行撫按官提問治罪其嘉  
靖五年六年七年坐派明文已到者行令查出即便如  
式填寫不許分毫遺漏前項一應侵盜縱容奸弊許諸  
人訐告所在官司即行聽理此等法程創立之初若非  
仰奉天語嚴加戒飭吏民解官解戶不知警畏而撫按  
諸臣不即奉行文具雖繁無益於事伏候命下之日本  
部造成前項簿籍刪削畧節告示底示行下各該衙門  
曉示愚民責令官吏如法過期倒換本部一面移咨都

察院轉行各該巡撫都御史并巡按監察御史查照奏  
行本意嚴督司府州縣等官但遇本部派到各項工料  
價銀并本色物件已徵者作急起解未徵者嚴限追徵  
過限一二箇月不完者府州縣徵收委官住俸半年不  
完者府州縣掌縣官住俸一年不完者布政司掌印分  
守官住俸俱候物料解部之日呈請撫按衙門方許開  
支住過俸糧不得冒呈幫補俱備咨部其府州縣徵收  
誤事委官亦聽司府官從重究問監候家屬杖限立完

若容令色攬委託非人司府自行作弊欺公玩法撫按衙門叅奏拏問巡撫巡按務要著實舉行毋事姑息一年一次回奏巡按候事完回京之日奏報况循環到部事有遲誤而奏無罰治自有聖明垂照雖本部亦難辭責候每年將終本部通將各衙門各官欠數查出舉其尤甚者移咨吏部黜降再照前項廢墜之弊雖稱府州縣大小官員不職至於大綱不舉不正實由布正司掌印佐貳及各府掌印正官苟且因循所致本部查出各

官廢弛數多抗違有迹者若倒換文簿故不依期而填  
寫又不依式者是有心廢法之人亦就移咨吏部將各  
官嚴加考覈年淺而素履謹愿者改調邊方無事衙門  
以稱其簡僻之才年深者遇缺暫免推陞以責其理辦  
之効候其完辦到部之日行文吏部序用如常前項查  
理之法本部亦要每年一次舉奏俱以次年二月為期  
如此則中外流通萬里如見而工職庶少修矣

清惠集卷五



欽定四庫全書

清惠集卷六

明 劉麟 撰

奏疏

年久損壞軍器疏

虞衡清吏司案呈奉本部送工科抄出兵仗局署局事  
內官監太監王竚等題據本局軍器庫管左副使楊鎮  
等呈稱本庫收放遞年聖駕看牲大祀天地四時享祭

開齋等項御馬監官勇士并神機等營擺隊官軍領用  
盔甲頓項臂手鐵袴馬甲馬臉尾鏡鈴攀等件年久多  
有損壞不堪領用等因具呈到此臣等逐令經手人匠  
逐一打點中間如果損壞數多不堪披戴照得本局見  
今成造上用一應物件及修造擺隊盔甲瓜刀等件并  
征進官軍領用軍火器械數多工程浩大查得前項損  
壞不堪軍器原係成化十八年節奉欽依本局差官前  
去南京兵仗局成造之數今經四十餘年竊照盔甲等

件干係朝廷護衛防奸威儀重務比與別項器械不同若不預為奏請誠恐有誤領用關係非輕合候命下之日本部另行具本照依成化年間事例成造式樣盔甲等件各一件副差委本局官員帶領經手官匠南京兵仗局督工照數如法儻造庶使軍器易得完備則官軍領用亦無有誤矣等因開坐題請奉聖旨工部看了來說欽此欽遵抄出送司查得成化十八年八月中該兵仗局署局事尚衣監太監廖屏等題稱本局見在造盔

甲瓜刀等件並征進領用軍火器械工程浩大及照大  
祀天地并開齋等項御馬監勇士神機營官軍擺隊關  
領盔甲等件年深損壞不堪披用及預備明鋼甲葉欲  
差長隨帶領經手匠作前去南京兵仗局提調造作合  
用物料行南京守備太監安寧等督同料計除該局見  
有及各庫衙門會關外欠少物料著南京工部措辦并  
應天府上元縣等支給官錢兩平收買應用各色熟絲  
線絨等料南京內織染局織染做工匠先儘本局見

在如有不敷於南京內外衙門借撥造完該用木櫃繩  
扛鎖鑰雨罩本局造成馬快船隻軍夫南京兵部應付  
計開成造明鐵盔三千五百頂甲三千五百副青紵絲  
絛穿齊腰甲一千七百五十副青改機紬絛明鐵頓項  
臂手鐵褲各六千五百副馬甲馬臉尾鏡鈴攀各六千  
五百副明鋼甲葉五千副差去長隨副使等官葉深等  
四員官匠作頭張聰等一十四員名等因開坐題奉憲  
宗皇帝聖旨是該衙門知道欽此欽遵抄出送司已經

備咨南京工部欽遵施行去後今該前因及查今次題造軍器比之成化十八年多造方手三千張撒袋三十副腰刀二千把袞刀一千把少明鋼甲葉五十副既不開有披執官軍數目亦無差官職姓名案呈到部臣等看得署兵仗局事太監王竚等題稱御馬監官勇士并神機營擺隊官軍領用盔甲頓項臂手鐵褲馬甲馬臉尾鏡鈴攀等件年久損壞要照成化年間事例成造式樣差官前去南京兵仗局修造一節為照前項盔甲等

件係聖駕郊祀等項擺隊官軍領用器械今稱年久損壞相應成造但計所造軍器比之先年數多合用物料工程費用不貲南京各衙門庫藏見今未能充實若一槩派取於民誠恐見今各處災傷重大民有不堪況自成造以來經今四十餘年未加修飾臣等有以仰窺先朝惜財節用之意近因災異節奉綸音拳拳以修省為言又奉有欽依凡一應工役暫皆停止以此修造多在觀美審時度勢亦應少緩以待年豐況今一歲將終方

行南京計造明春大祀擺設已不及用合候命下之日  
本部行移兵仗局仍將收貯前項器械照舊應行候至  
四方無事累歲豐登公私財力寬裕之日另行舉奏如  
不容已乞令該局從實揀選其中但可披執者雖欠鮮  
明亦就取用將奏擬之數量減三分之二使新舊相兼  
工料數少則公私易辦而民力少舒惟伏別有定奪均  
乞聖裁

奏建節慎庫疏



營繕清吏司案呈奉本部送准戶部咨嘉靖八年二月二十四日該司禮監太監張欽傳奉聖旨朕惟天下財物不在民則在官取諸民以貯之官其取之也甚難則用之也豈可無節周易曰節以制度不傷財不害民孔子曰節用而愛人此帝王之明訓也今在外錢糧各有撫按等官督理查考歲奏月報自可稽察奸弊在京惟太倉俱有成規其餘內外衙門各項錢糧因無官查理積弊多端且如後府柴炭銀兩及團營子粒銀該營官

員收管之際多方掊剋比其支用漫無查考多有侵盜私用夫以軍民膏血之餘而徒為奸豪漁獵之資深可痛恨你戶兵工三部即便通行查議但係有錢糧衙門俱要差委科道官監收查理通行歲報庶革奸弊以裕國用太僕寺常盈庫馬價銀兩但見奏請支用其見在收貯之數不見開報今後年終也著將舊管新收開除實在數目造冊繳部具本奏知其餘未盡事宜你各部推廣此意具奏而行以稱朕節財恤民之意欽此欽遵

照得本司與虞衡都水屯田共為四司正係在官錢糧衙門本部設立衙門之時蓋有大庫一座規矩頗宏但無隔別會官監查之例其庫設在本部之後有部堂二重并大牆限隔別無中正大路前通加以堂司勢分懸殊非有重大事情各司不敢逕入解官解戶不赴前庫亦已年久但有收放俱是司庫司收候至開支亦是司官自放事雖簡便浮謗易生往往正官有缺各官稱疾不肯任事考察之際時論偶及無以自明因無查理以

致如斯請官監查義意最善但路道不便相應計處欲將本部大庫量加修葺比照戶部太倉庫行移提督侍郎管理請差御史監查添設庫官庫吏並撥長守之卒立短巡之法量設聽事舖設限以收放之期定以查盤之法按季輪差郎中員外郎等官一員監管其事并照舊規輪帶都吏一名知數及辨驗銀色等因案呈到部臣等詳其所議不為無見隨即差人相度得本部本庫之北循鑾駕庫外牆而行正與東朝房一間相對查係

兵馬司管住其房年久損漏可以改為門道庫官庫吏  
不必增添本部所屬皮作局其務甚簡可以改為庫官  
駕閣庫吏並匹料典吏其役不煩俱可改為庫吏原衙  
原役各仍其舊其收受也每年三六九月曉告納戶依  
期聽收止令本部行文該司轉送該庫查收出給庫收  
送司其於支也該司轉送並同定以每月一次或一季  
一次俱在每月二十五日為常一年既周舊管新收開  
除實在聽本部提督侍郎公同造冊具奏仍一二年一

次隔別委官查盤積出附餘報官作正支銷其合用籍冊紙張書造工食冬季炭斤並公會筆炭許於此內公同支取若有虧折其原收原放官員身任其咎庫門並內外牆門責委虞衡司掌管仍赴堂驗封鎖鑰遇委官到庫稟堂方開或責令提督侍郎封收此法一行在部掌案者與庫藏無干而在庫收受者與徵派無別一官不到則鍵鑰不啟一工不至則支放不行本部本司本庫明立文簿一樣三本司務廳嚴加磨算務查有巡視

典守親筆書判方纔准理分毫不明聽本部從實覺舉  
其循牆南北設立更鋪各一於所屬地方武功中等三  
衛內選取軍人四名若輪班不敷聽於各該廠局看守  
又將本部巡更舊該官吏監生匠作均分一半在彼巡  
查每夜巡風司官報單具結以憑查考伏候命下之日  
量支官銀以為工食行取變賣尼僧庵房以為廳舍將  
各項朝房一間改為門道空缺之處補築牆垣官吏行  
移吏部照前改設若有重大工役銀兩數多吏人書辦

不前許於本部勘合科內臨期添撥應用收放銀料之  
日本部行移提督侍郎並管庫委官都察院行移該城  
御史查照施行其關防有未盡者事宜聽臣等臨事損  
益另行具奏如此則利權隔別彼此綱維官吏分役互  
相覺察百年積弊一旦維新舉部臣工皆有忍渴迴車  
之義亦可以少裨皇上節財恤民之意於萬一矣原係  
傳奉及監收革弊事理未敢擅便題請旨奉聖旨工部  
四司俱有錢糧出納前此屬官賢否不一堂上官又不



加嚴切查考所以浮謗易生覽卿所奏欲彼此關防互相覺察深得率屬奉公之義修葺大庫開通道路改設官吏等項都依擬行仍聽本部侍郎一員督理就差該城御史監查務使衙門肅清浮議永息若有未盡事情還徑自損益施行應具奏者具奏定奪欽此欽遵外為照庫藏既立當揭額定名以垂久遠官吏既設當給印信以防奸弊且庫既在部堂之後鑾駕庫之西則腹背空虛前議於武功中三衛選取軍人各四名巡守恐有

不敷相應添取又照本庫所貯本以奉國之公伏讀聖旨有率屬奉公之諭欽承德意似當名曰奉公之庫若求設庫本意不宜濫興工作以節為本又於收支之際不宜橫取悖出以慎為上名為節慎意義亦通又惟一庫雖小而正名訂義非聖莫裁乞為上請等因案呈到部臣等看得本部大庫之名出於胥吏口傳未經奏立定名今既特設官員收放卷吏隔別必有關防印信則庫收可徵若庫名未降則印信無憑鑄造况此庫一歲

之間月無虛日而出入浩繁動累千萬今該司奉舉呈  
前來相應依擬合候命下之日將本部大庫賜以定名  
上請轉行禮部照名鑄給印信一顆付與庫官收掌仍  
行武功中等三衛於餘丁內各選十名前來與原定軍  
人相兼防守如此則綱維始備名正法嚴而奸弊亦永  
絕矣緣係傳奉事理未敢擅便謹題請旨奉聖旨是庫  
名定為節慎欽此

應詔陳言疏

營繕清吏司案呈云云伏承明命下臨曷勝感激連日  
調集簿冊揭查得本部一應工役雜派皆由內府監局  
題奉欽依行之本部本部覆題行之天下良以內御尊  
嚴而綸音渙發或派徵未到那借已入二月之絲五月  
之穀率以為常於此每切痛心無從下手雖知民貧雜  
派當減而不知何物可減已知歲凶工役當罷而不知  
何工可罷苟利因循積成深痼今日民不聊生臣等豈  
能辭責茲欲即分緩急亟議節省如大旱之得雲霓而

一雨沛然豈不痛快但事關監局頭緒頗多工役分任有似緩而實急者有似急而實緩者又有一工而緩急相半者推而至於雜派其勢亦然豈敢截然分別徑行節省為今之計莫若審度公私之力叅以沿革之宜求其成額量加減抑通行主典之人於供辦俵散之際各查緩急而自為減殺或謂衆輕易舉又令每人每事量加如此則緩急得宜而節省有漸事無窒碍而公溥可行今有截然可急而不可緩者臣等先行開豁如悼靈

皇后陵域之工惜薪司柴炭之派皆仍其舊已不敢妄  
煩天聽其內官監等監成造家火金箔鉛膠顏料羊毛  
牛皮麂皮松杞榆椴木等料軍器局等局成造盔甲旗  
牌筋鐵翎鰓等物雖係年例名數浩繁一一較量互有  
緩急冗瑣難分今年各該監局未曾題派到部即有到  
者日亦未久不曾派行事尤可及乞勅下各該監局各  
遵德意念此災傷生民不幸至於相啖工役雜派豈可  
拘泥常年合照成化弘治前年分適中之額為率於此

審其急者量減三分之一至於緩者則許其減半又其  
最緩則停派一年二年若然賜減一分者民蒙一分之  
惠減其半者則民之受賜亦已半矣全與停罷者則民  
之蒙惠亦然所奏節省本意雖古先哲王恭儉之道未  
能盡然而天下生靈沍可小康再有不堪或令查奏未  
備如造酒家火掠馬索麻之類許令臨事稱停陸續釐  
正期在皇澤霑濡羣生溥洽使敷天之下咸知大聖人  
布德同春而枯槁回生也如各該監局失於查照或喜

事貪功或拘常習舊仍欲工繁派重以致皇上悞與准  
行許令本部覆題改正又不知遵許聽言官論劾必使  
上無虛文下霑實惠則庶幾乎古先哲王敬天勤民之  
業若斷然行之不疑有淪膚浹髓之妙雖神禹惡衣服  
卑宮室之盛何以加焉今將本部工役雜派并應停應  
減緣由開立前件具題

一傳奉事修補恭讓章皇后景皇帝等陵墳前件臣等  
看得此工宜緩前項陵墳玄宮幽壙本自安固止為殿



宇門牆觀美不備本部已嘗題請停工未蒙俞允後因冬寒比照悼靈皇后陵役停工之旨具題方蒙賜允不過暫停節奉欽依又諭令待春和舉奏興工不許違悞欽此近該內官監手本到部催修為照悼靈皇后陵域工程煩費已甚官軍困苦亦久一工未畢即興一工似非今日恪謹天戒深惜民隱之意况值災傷重大不敢派徵小民伏乞聖明降旨停罷將拆卸之處量加苦益以待豐年

一御馬監監承郭鑑題稱添蓋悼靈皇后果園菜園房屋共六十二間座前件臣等看得此工宜緩凡種木者求用於十年之後見今果木未有萌蘖而輒行蓋造房屋事誠可緩若謂栽種長養及整理菜畦姑用牆垣遮護房屋之工伏乞聖明降旨停罷待果木有成之日另議

一織造局節差陝西南京蘇杭織造內臣四員前去監織前件臣等看得此工宜緩近因科道等官建議本部

覆題奉有欽依將陝西織造太監梁玉取回其未完者  
責付鎮守太監陸續織造又將此項銀兩動支以濟彼  
中之急臣等聞之陝西軍民以手加額歡呼震動今照  
南京蘇杭之處織造與陝西事體相同彼中亦有守備  
內臣可付況今日災害比初尤甚而各府正官尚且免  
其朝覲以撫人民其急可知二處織造內臣伏乞聖明  
許照陝西一例取回未完者亦付彼中守備鎮守等官  
織解惟或盡行停止實足以昭陛下恭儉事天之實

一針工局間年題派成造年例內官長隨內使冬衣紵  
絲綾紬荒絲折熟絲綿共二萬八百九十七足斤兩前  
件臣等看得此工緩急相半本部擅難分別其費算該  
京價六萬一千九百四十七兩二錢五分前項冬衣先  
年俱該會支各庫物料成造冬衣折散本色近來俱作  
會支奏討折銀遂為常例至今派天下於贓罰銀兩支  
解緣各處庫藏空虛人民相食賑濟尚且不敷有何官  
銀可解以至全無解到本部那借別項料銀六萬之多

豈能容易處補見今空乏將盡且既不成造本色則針線之物豈煩公辦伏乞聖明敕下司禮監清查各該俵散人員須照天順以前年分額數又於此內分別何者當急何者當緩將最急不可緩者查出實給若干員名念此災傷重大諭令題派量減三分之一豐年照舊其餘可緩者改令間年一俵悉於內庫會支本色其事故冒支者於法有碍不問災豐一體罷除俱候該監奏請定奪

一內官監成造修理家火事派出杉榿槐椴等木青綠顏料金銀錫箔油漆紙竹篾蒲稻草生熟鐵柴炭等料共三百二十三萬四千一百一十九根片箇斤兩張前件臣等看得此工緩急相半本部無從分別算該軍價銀一萬七千四百六十一兩三錢此外又有本色庫廠放支不在此數而派徵至於如此之多且歲歲造派豈無一半家火見存若能新舊相兼其料相應議減伏乞聖明敕令減半該監將不急之物暫免修造又查驗先

年造辦家火係鐵錫竹木在有可用者許其相兼應用  
派行折半兌除

一光祿寺每年題出修造供應器皿天順年以前傳聞  
數少但卷案不存無憑查照成化十二年取用器皿最  
多之日查有定數總一萬件本部成造七千南京成造  
三千合之共為萬件至弘治二年又准添造始至一萬  
二千本部造該八千四百件南京造該三千六百件近  
年以來常數之外又立預借名色嘉靖七年借過嘉靖

八年者四千九百餘件每年竹木油漆羅絹祇等項共  
七千七百三十四件合用杉板油漆金箔銀硃羅絹等  
料共六百六十六件合用銅鐵錫料共四萬五百三十  
七斤前件臣等看得此工難緩此料宜節算該京價共  
三萬六千七百九十四兩一錢六分為照前項器皿備  
足如此數年之內豈宜盡壞縱有損失不過三四存者  
有六七可以攬修再進一萬二千之數不至缺失以為  
國患今又立預借之名任情浪費所謂取之無度用之



無節者矣蓋緣禁御之中難於點視飲膳所到逼近尊嚴  
食器俱留者有之燒毀折裂者有之由是金硃布漆化  
為灰燼公侯監署得藏禁器生民膏血有限官府費耗  
無窮不可不為之處伏望聖明敕下光祿寺今後務加  
愛惜責令將用過舊器發出以備修補每年工作止造  
七十數盡即止如新者進十則舊者發七不然亦發五  
六次年造送之日除餞金器皿係常御俱新造進用外  
其餘光素硃紅者則新舊相兼亦可以節省一倍著為

成例七十數滿不得預支仍着該司巡視御史按季點查具奏如此則國制不嫌簡略而小民供器有常數矣一司設監成造牀帳氈絨紗羅紵絲綾紬荒絲折熟絲棉毛皮柴炭松柁等料共七十八萬五千三百斤張根前件臣等看得此工宜緩算該京價一萬三千九十兩前項器物間年派造以嘉靖六年新造至七年乃成迄今未久豈必盡已腐壞縱有缺損亦不過十之一二即欲計料補修亦不過十之一二况先年存積未壞者

頗多今值災傷伏乞聖明敕令免派

一兵仗局坐派成造軍器水火炭石灰共一百四萬斤  
臣等看得此派難緩者但查有處補可免派徵除石炭  
四萬斤水火炭五十萬斤刑部贖罪囚犯內撥納外其  
水火炭五十萬斤每年分派順天等府辦解仍該京價  
一千七百五十兩今各處災傷合儘數於刑部贖罪囚  
內撥補伏乞聖明敕令該局暫將今年免派豐年仍舊  
一巾帽局為年例事坐派年例紗羅皮張等料共四十

二萬四千四百七十一足張斤截三分五兩二錢八分  
前件臣等看得此工緩急相半本部擅難分別其費算  
該京價八萬四千四百七十兩二分五釐卷查除與上  
年相同不開外其白硝麋皮比常多派一萬九千三百  
五張羊毛多三千斤水膠三百斤白生素平羅多一十  
七疋共多銀一萬一千五兩三錢伏乞聖明特敕司禮  
監官查出見今各用之處何者當急何者當緩當緩當  
急之處實該若干員名務照天順以前年分額數將應

給之人諭以災重民貧各減三分之一料派所減分數亦同司禮監先行其實上請若近日多派麕皮羊毛平羅等物係妄增非舊不問災豐一例除革此項正德十六年詔令會同查理先儘在庫本色不敷者將沒官贓物依折實憂派徵之重今未舉行反又加派似無紀極相應量減以便遵行或再寬年分以蘇民力

一供用庫每年題派散木生熟鐵柴炭等料共六十五萬五千七百二十七根斤段片箇前件臣等看得此工

似不可緩但所派過多查得前料該京價銀四千四百八十六兩八錢其用不過為打造香油一事如板箱先年原計八百箇至嘉靖三年加造四百九十九箇實增大半又如生熟鐵器等件恐無年年盡廢之理而乃年年全辦縱有不堪舊廢殘缺尚堪折造年年有進無出其積必多伏乞聖明敕令該監從實查奏先將妄增板箱徑自革除柴炭等料念災三分減一生熟鐵器定以幾年一次行部新舊攙修

一內官監修造淨車一百九十五輛前件臣看得此派  
宜減卷查修造淨車五年一次先年原議用銀二千二  
百五十兩派行府徵銀解部該監領銀自造至嘉靖六  
年又奏添銀五百兩為照修理淨車百十年來相乘之  
數奈何一二年間遽爾增銀五百伏望聖明敕下該監  
生止照舊額不必加派

一修蓋倉廩事京通二倉每年該修倉員外郎主事計  
派柁木等料共六十二萬九千五百八十根斤前件臣

等看得此工難停此派可緩算該京價銀二千四百六十三兩七錢五分本色已將嘉靖八年物料共通行免派俱於舊管項下取用若有不敷即於軍辦數內取用俱照前免派候舊料用盡軍辦不足之日許行部議擬上請

一明節省之要蓋省節須計有無以為損益夫監局累世累年派解不絕如皮張絲線顏色等料不拘本色折色月轉歲解積之內藏者不可勝數若不通行內外廠



局盡行查出雖聖諭諄諄戒令節省然備臣等於此尤不勝拳拳之至嘉靖八年六月二十八日奉聖旨是悼靈皇后陵域工程惜薪司柴炭派納金山陵墳俱照舊菜園菜園房屋罷其餘工程准待年豐舉行其應該減免定立年分派辦并成造器皿修理倉廩等都依擬行新派妄增之數查出改正明省節之要清緩急之源准議係內府監局的著司禮監會同該管衙門用心查理著實舉行欽此



清惠集卷六